

**Kalaallit Nunaata Nunavullu allaffissornikkut politikikkullu
suleqatigiinnerulersinnaanerannut periarfissat pillugit kiisalu
niueqatigiinnerulersinnaanermut periarfissat pillugit nassuiaasiornissamik
Naalackersuisut peqquneqarnissaannik Inatsisartut aalajangiiffigisassaattut
siunnersuut.**

(Inatsisartunut ilaasortaq Doris Jakobsen, Siumut)

Akissuteqaat

(Naalackersuisut Siulittaasuat
kiisalu Nunanut Allanut Naalackersuisoq)

1. suliarinera

Naalackersuisut Inatsisartunut ilaasortap Doris Jakobsenip aalajangiiffigisassatut siunnersuutaanut qujapput.

Kititsinni eqqaamiutsinnik suleqateqarnissarput Naalackersuisunut pingaarutilerujussuuvooq, assigiissuterpassuaqaratta assigiinnillu soqutigisaqaratta, ilaatigut Canadami Nunavut eqqarsaatigalugu. Tamatuma saniatigut Nunatsinni Nunavumilu innuttaasut inuttut, kulturikkut inuttullu atukkatigut atassuteqarput allanngutsaaliussallugu pingaaruteqartumik. Nunarput Nunavullu arlalitsigut suleqatigiilluareerput.

Nunarput Nunavullu 2000-imi Memorandum of Understandingimik (MoU) atsiarput. Taanna kingusinnerusukkut nannut pillugit (2005) niuerneq pillugu (2006), ilinniartitaaneq pillugu (2011), kultur oqaatsillu pillugit (2012), kiisalu atuarfiit pillugit Communiqué pillugu (2001) suleqatigiinnissaq pillugu MoU-mut ilanngussamik malitseqartinneqarpoq.

Susasaqartut soqutigisaannik akuerseqatigiilluni, kiisalu naalackersuisut suliassaannik naammassinninnissamut innuttaasullu atugarissaarnissaannut tunngatillugu susasaqartut soqutigisaannik pimoorussilluni Nunatta Nunavullu akornanni suleqatigiissinnaanermut periarfissat misissorneqarnissaat MoU-mi siunertaavoq.

Suleqatigiinnissamut suliniutit kingulliit ilaat tassaavoq misiligutit suliniut, tamatumani Nunavummiut marluk pikkorissartitsinerni Sisimiuni Aatsitassalerinermik Ilinniarfimmi pisuni pikkorissartut kalaallit peqatigalugit nalinginnaasumik pikkorissaqataallutik. Misiligutit suliniut Nunanut Allanut Pisortaarfimmit Aatsitassalerinermillu Ilinniarfimmit, kiisalu Nunavut naalackersuisunit aningaasalerneqartoq 2013-imi naammassineqarpoq, tamannalu iluatsilluarpoq, tassami pikkorissartut taakku marluk pikkorissartuutivut assigalugit peqataasinnaasimmamata pikkorissarnerlu naammassimmat taakku Nunavumi aatsitassarsiornermut tunngasuni suliassanut nutaanut marlunnet piginnaasaqarnerulersinneqarsimallutik.

Tamatuma saniatigut Naalackersuisut ilisimatitsissutigisinnaavaat Premierminister Peter Taptuna malittaalu sap. ak. 27-mi Nunatsinnut aallartitatut tikeraassammata. Taakku tikeraarneranni susasaqartut ilaatigut Memorandum of Understanding malitseqartissavaat inuussutissarsiornermullu tunngasuni suleqatigiissutaasinnaasunik allanik ujartuissallutik.

Aammattaaq erseqqissaatigeqqinneqarsinnaavoq Nunanut Allanut Pisortaqarfik niuerneramik misissueqqissaarnialersaarmat, aamma Aasiamut, Islandimut Amerikallu Avannaanut tunngatitassamik, taamaattumik Nunavut Nunattalu akornanni niueqatigiinnissamut periarfissat pillugit immikkut nalunaarusiortoqarnissaanik siunnersuut pisariaqarani.

Qulaani allassimasut naapertorlugit Inatsisartunut ilaasortap Doris Jacobsenip aalajangiiffigisassatut siunnersuutaa Naalackersuisut akuerisinnaanngilaat.